



**L**eo apud Heluetios natus & educatus, à teneris annis operam literis dedit, & rudimētis cognitū ad Basiliensem Academiam peruenit. In ea Thoma Vuitenbachio præceptore usus, liberalibus artibus incubuit, & anno 1512 artium Magister creatus fuit. Postea quoq; cum Huldrico Zuinglio Theologiæ operam dedit, atq; in ea facultate plurimū profecit. ad hanc eruditionem accedebat uitæ integritas. Itaque Tigurum uocatus, eius Ecclesiæ minister constituit. In eo loco Leo Euangelij doctrinam magnā diligentia prædicauit, atq; cunctis doctis innotuit. Cum autem is Hebraicæ linguæ esset peritissimus, ueteris Testamēti libros

simplici & pura dictione e sacra Hebræorum lingua, consultis simul orthodoxis interpretibus, in Latinam trāstulit, quin etiam tota Biblia Germanicè reddidit, ad Hebraicam ueritatem cum Iudæo quodam singulis diligenter collatis, & Tiguri 1540 editis. Ex ore etiā Zuinglij annotationes in Genesin & Exodum, item in 4 Euangelistas, passionis Dominicæ historiam, ac in Epistolas Pauli ad Romanos, Corinthios, Philippenses, Colossenses, Thessalonicenses, & S. Iacobi, excepit, & post eius mortem publicauit. Præterea opus cōclusionum Zuinglij e Germanico Latinum reddidit, atq; Catechismum maiorem & minorem conscripsit. Cum hoc modo scribendo et docendo Tiguri in pretio haberetur, tandem senex circa annum 1544 obiit, & honorificè ibidē sepultus fuit. Con. Gess.